

17 kes positif di Menara City One hadir Himpunan Jemaah Tabligh di Sri Petaling
Astro Awani
31 Mac 2020

PUTRAJAYA : 17 kes positif jangkitan COVID-19 di Menara City One, Jalan Munshi Abdullah dilaporkan hadir Himpunan Jemaah Tabligh di Masjid Sri Petaling Februari lalu.

Ketua Pengarah Kesihatan, Datuk Dr Noor Hisham Abdullah berkata, peningkatan kes COVID-19 yang mendadak menyebabkan Perintah Kawalan Pergerakan Diperketatkan (PKPD) dilaksanakan.

"Kita dapati kes di Menara City One ada 17 kes telah dilaporkan yang ada kaitan dengan indeks yang menghadiri Himpunan Jemaah Tabligh di Masjid Sri Petaling.

"Kes indeks telah menjangkiti ahli keluarga tersebut. Kebanyakan yang terlibat ialah tiga apartmen iaitu melibatkan seramai keluarga 12 ahli. Jadi ada kes yang mendadak di apartmen itu, tindakan kita ialah PKPD di kawasan tersebut," katanya dalam sidang media di sini pada Selasa.

Kerajaan pada Isnin membuat keputusan untuk melaksanakan PKPD di keseluruhan Menara City One, Jalan Munshi Abdullah, di ibu negara bermula jam 12 tengah malam.

Menteri Kanan (Kluster Keselamatan), Datuk Seri Ismail Sabri Yaakob dalam satu kenyataan berkata keputusan itu dibuat selepas mendapat nasihat daripada Menteri Kesihatan.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/17-kes-positif-di-menara-city-one-hadir-himpunan-jemaah-tabligh-di-sri-petaling-236141>